

gressum se facinus omnino pulchrum : sed pulchrius adhuc aggressurum fuisse , si ut in nauticum apparatus flamma , ita in Regis caput ferro grassari licuisset . Demiratus adolescentis indolem Mahomethus , non Porſenam Regem , sed barbaram feritatem ſecutus , eum cum ſociis medium ſecari juſſit . Patres poſtquam illum ſuo præmio ornare non potuerunt , dote ejus ſorori ex publico data , annuum fratri ſalarium conſtituere . Hybernabat Neapoli claſſis , eratque imperator (ut dixi) oppido & claſſi muniendæ intentus , dum Perſarum Regis & Catharini Zeni literæ ad Principem & Senatum eo allatæ ſunt , quibus idem fere petebatur , quod & per legatum paucis ante menſibus ; eas ſubito Mocenicus triremi ad id parata Venetias perferendas curavit . Quibus Patres moti , conſeſtim ingentem tormentorum numerum undique expediunt ; vaſa ad hæc aurea magnifice cælata , Veronenſis panni vim maximam , & ex purpura multos , nonnullos etiam aureos Regi dono deſtinant : centum præterea juvenes , qui æneas machinas exercerent , quibus Thomas Himulanus eſt præfectus . Joſephus Barbarus , homo magnus natu , verum Perſicæ linguæ non ignarus , eſt miſſus , qui publico nomine ad Regem munera deſſeret : quorum tanta vis fuit , ut tres onerariæ ad ea convehenda inſtructæ ſint . Omnibus itaque paratis , Barbarus proſpera uſus navigatione , in Cyprum delatus eſt , mox ubi in maritima Ciliciæ aut Syriæ veniſſet , ad amicum Regem tranſmiſſurus . Mandant ad hæc Patres Mocenico per literas , ut ad Uſuncani juſſa habeat claſſem paratam , conſeſtim eo iturus , quo ab illo accerſeretur .

Othomanus interim , Byzantio præſidiis munito , ingentibus copiis in Aſiam tranſmiſerat , ut tanti belli incendio occurreret . Venetus & ipſe (quia fama erat , Caramanos fratres , Perſarum Regis ſocios , quos Othomanus paterno regno ſpoliarat , maritima Ciliciæ oppida oppugnare) Perſæ gratificaturus in Cyprum ſub vernum tempus cum tota claſſe venit , ut maritimis auxiliis Caramanas opes juvaret . Idem ferme equitum aliorumque navalium ſociorum